

## Inatsisissatut siunnersuummut oqaaseqaatit

**Oqaaseqaatit nalinginnaasut****1. Inatsisissatut siunnersuutip tunngavia**

Avaleraasartuut akitsuutaat, avaleraasartoornerup 2013-imi pimoorussamik aallartinneqarnerata kinguninngua 2014-imi atuutilersinneqarpoq, Qalerallit avataasiorluni aalisarnermi pisarineqartut akitsuutaat pillugu Inatsisartut inatsisaata allanngortinneqarneranik Inatsisartut inatsisaat nr. 10, 8. juni 2014-imeersumik (Avaleraasartuut akitsuutaat). Avaleraasartuut 55.000 tonsit missingi 2013-imi pisarineqarput, akitsuutillu atuutilersinneqarfiani 2014-imi avaleraasartuut 78.000 tonsit missingi pisarineqarlutik.

Akitsuut atuutilersinneqarmat avaleraasartuumut kiilumut akitsuut 0,95 kr.-inik angissusilerneqarpoq, apeqquaatinnagu aalisarneq angallatit Kalaallit Nunaanni nunaniluunniit allani, aamma Danmarkimi Savalimmiunilu angerlarsimaffeqartutut nalunaarsorneqarsimasut atorlugit ingerlanneqarnerisq. Akitsuulli kingusinnerusukkut allanngortinneqarpoq, avaleraasartuunut angallatit nunani allani angerlarsimaffeqartutut nalunaarsorneqarsimasut atorlugit pisarineqartunut kiilumut 1,50 kr.-inngortillugu, avaleraasartuunut angallatit Kalaallit Nunaanni angerlarsimaffeqartutut nalunaarsorneqarsimasut atorlugit pisarineqartunut akitsuut allannguteqartinneqanngitsq. Akitsuutinik assigiinngitsuutitsineq angallatit taakku Kalaallit Nunaannut selskabit akileraarutaannik akileraarutinillu A-nik akiliisannginnerannik tunngaveqarpoq.

Avaleraasartuut 2015-imi 2016-imilu pisarineqartut amerlassutsimikkut appararujussuarput, tassa pisat 30.000 aamma 35.000 tonsinut apparmata. Tamanna assigiinngitsunik pissuteqarsinnaavoq, soorlu silaannaap allanngorarneranik, allaffissornermi periaatsit assigiinnginneranik, piffissaq aalisarsinnaanermut akuersissuteqarfiusoq kiisalu akitsuutit aaqjissuusaanerat. Pissutaasoq kingullertut taaneqartoq Kalaallit Nunaanni aalisarnermik inuussutissarsiutinik ingerlataqartut, aalisarneqartut ikileriarnerannut pissutaanerpaatut tikkuarpaat. Tassa pingaartumik tikkuarneqartoq tassaalluni akitsuutit assigiinnginnerujussuisa soorlu aalisakkanik allanik, avaleraasartuujunngitsunik aalisarnissaq soqutiginarnerulersikkaat.

Ukiuni kingullerni pisarineqartut ikileriaateqaraluartut Kalaallit Nunaat, avaleraasartoornerneq Tunumilu misileraalluni aalisarnermut atatilluguavaleraasartoorfimmik sineriaqartutut inissisimalersimavoq, tamannalu pissutigalugu Kalaallit Nunaat nunat avannarliit avaleraasartooqassutsimik aqutseqatigiinnissaanni, ukiunilu aggersuni pisassiissutit amerlassusissaannik nunallu akornanni agguuassinissanik isumaqatigiissuteqarnissaanni sunniuteqataasinnaalersinneqarpoq. Naalagaaffiit avaleraasartoornermut atatillugu sineriallit tassaapput EU, Norge, Savalimmiut aamma Island, aammalu Kalaallit Nunaat. Kisianni

pisassiissutissanik tunineqarnissamut pisassanillu agguataarinermut aalajangiissuulluinnartussat tassaapput pisaasarsimasut amerlassusii. Taamaammatt avaleraasartuunik aalisarnissap pilerinartuunissaata ukiuni aggersuni annertusarneqarnissaa pingaarluinnartuussaaq.

Tamannalu tunngavigalugu siunnersuut avaleraasartuut akitsuutaannik appaanissamik siunnersuummik imaqarpoq. Akitsuutinik appaannissap avaleraasartuunik nunatta imartaani aalisarnissamik soqutiginarnerulersitseqataanissaa, taassumalu saniatigut aamma Kalaallit Nunaa-ta siunissami avaleraasartuunik pisassat ilaannik amerlanerusunik ataavartumik pisassinneqartarnissamik piumasaqarsinnaalernissaanik siunertaqarpoq.

## 2. Siunnersuutip imarisai pingaarnertit

Inatsisissatut siunnersuutip kingunerissavaa avaleraasartuut angallatit Kalaallit Nunaanni angerlarsimaffeqartutut nalunaarsorneqarsimasut atorlugit pisarineqartut kiilumut akitsuutaata 0,95 kr.-imiit kiilumut 0,40 kr.-imut appartinneqarnera, avaleraasartuullu angallatit Danmarkimi, Savalimmiuni nunaniluunniit allani angerlarsimaffeqartutut nalunaarsorneqarsimasut atorlugit pisarineqartut kiilumut akitsuutaata 1,50 kr.-imiit kiilumut 1,00 kr.-imut appartinneqarnera.

Avaleraasartuut akitsuutaasigut isertinneqartussat 2017-imi Aningaasanut inatsimmi 40 mio. kr.-iusussatut missingersorneqarput, naatsorsuutigineqarmat kalaallit angallataataat atorlugit pisarineqartussat 20.000 tonsit missaanniissatut, nunat allamiut angallataataat atorlugit pisarineqartussat 15.000 tonsit missaanniissangatinneqartut. Avaleraasartuut akitsuutaannik appaanissaaq missingersuutinut sunniuteqassangatinneqanngilaq.

Inatsisissatut siunnersuut inatsimmut atuuttumut sanilliullugu	
<i>Oqaasertai atuuttut</i>	<i>Inatsisissatut siunnersuut</i>
	<p>§ 1</p> <p>Qalerallit avataasiorluni aalisarnermi pisarineqartut akitsuutaat pillugu Inatsisartut inatsisaanni nr. 11, 3. december 2012-imeersumi, Inatsisartut inatsisaatigut nr. 9, 29. november 2013-imeersukkut, Inatsisartut inatsisaatigut nr. 10, 8. juni 2014-imeersukkut, Inatsisartut inatsisaatigut nr. 35, 9. december 2015-imeersukkut kiisalu Inatsisartut inatsisaatigut nr. 9, 6. juni 2016-imeersukkut allanngortinneqartumi makku allannguutigittinneqarput:</p>
§ 3a Suliffeqarfiit imaluunniit inuit aalisakkat ikerin-	<p>1. § 3a, imm. 1, nr. 3, litra a-mi allassimasooq "kiilumut 0 kr. 95 øre." allanngortinneqarpoq</p>

<p>narsiortut ilaannik Tunumi, nunat allat aalisarnikkut oqartussaaffigisaanni imaluunniit nunat tamat imartaanni aalisarnissamut pisassinneqarsimasut landskarsimut akitsuummik akiliissapput. Akitsuutit, angallatinut Kalaallit Nunaanni angerlarsimaffeqartutut aamma Danmarkimi, Savalimmiuni nunaniluunniit allani angerlarsimaffeqartutut nalunaarsorneqarsimasunut tunngatillugu angissuseqarput:</p> <p>1) – 2) – 3) Avaleraasartooq, a) angallat Kalaallit Nunaanni angerlarsimaffeqartutut nalunaarsorneqarsimasooq atorlugu pisarineqartoq ... kiilumut 0 kr. 95 øre. b) -</p>	<p>ima: ”kiilumut 0 kr. 40 øre.”</p>
<p>§ 3a.</p> <p>Suliffeqarfiit imaluunniit inuit aalisakkat ikerin narsiortut ilaannik Tunumi, nunat allat aalisarnikkut oqartussaaffigisaanni imaluunniit nunat tamat imartaanni aalisarnissamut pisassinneqarsimasut landskarsimut akitsuummik akiliissapput. Akitsuutit, angallatinut Kalaallit Nunaanni angerlarsimaffeqartutut aamma Danmarkimi, Savalimmiuni nunaniluunniit allani angerlarsimaffeqartutut nalunaarsorneqarsimasunut tunngatillugu angissuseqarput:</p> <p>1) – 2) – 3) Avaleraasartooq, a) – b) angallat Danmarkimi, Savalimmiuni nunaniluunniit allani angerlarsimaffeqartutut nalunaarsorneqarsimasooq atorlugu pisarineqartoq ... kiilumut 1 kr. 50 øre.</p>	<p>2. § 3a, imm. 1, nr. 3, litra b-mi allassimasooq ”kiilumut 1 kr. 50 øre.” allanngortinneqarpoq ima: ”kiilumut 1 kr. 00 øre.”</p>
	<p>§ 2</p> <p>Inatsisartut inatsisaat 1. juni 2017-imi atortuulissaaq.</p>

### **3. Pisortanut aningaasatigut allaffissornikkullu sunniutissai**

Naatsorsuutigineqarpoq kalaallit angallataataasa akitsuummumut akilertagaannik kiilumut 0,95 kr.-imiit kiilumut 0,40 kr.-imut appaaneq, taakku pisarineqartussatut 2017-imi Aningaasanut inatsimmi missingersorneqartunut sanilliullugu 10.000 tonsinik pisaqarnerunissaannik kinguneqassasoq. Taamatuttaaq nunat allamiut akitsuummumut akilertagaannik kiilumut 1,50 kr.-imiit kiilumut 1,00 kr.-imut appaaneq, taakku 15.000 tonsinik pisaqarnerunissaannik kinguneqassangatinneqarpoq. Taamaalilluni naatsorsuutigineqarpoq akitsuummik appaaneq, kalaallit nunallu allat angallataataasa avaleraasartuunik katillugit 60.000 tonsinik pisaqarnissaannik kinguneqassasoq.

Taamaammatt 2017-imi isertitassatut missingersuutaasut 40 mio. kr.-it, 2017-imi Aningaasanut inatsimmi taaneqartut allannguuteqassangatinneqanngillat. Tassa imaappoq allannguutit missingersuutitut sunniuteqassangatinneqanngillat.

Tassunga atatillugu apeqqutaassaaq piffissaq 2017-imi avaleraasartoortassatut pisassiissutissat tunniunneqarfissaat aalisartussat aalisarnissaminnik pilersaarusiornissaannut aalisarnissaannullu naleqquttumik piffissaqartitsissanersoq.

Avaleraasartuut pisat 2013-imi ukiumut 30-80.000 tonsit missaasa akornanni nikerarput. Taamaattumik iluanaarutissatut missingersuutigineqartut nalorninarqarsinnaapput. Pisarineqartut nikerarnerannut ilaatigut pissutaavoq, avaleraasartuut aalisagaammata nikerartut sumiiffimmi ataatsimi sivisuumik uninnganeq ajortut, ilaatigullu aalisarneq. Aalisanginnermut tunngavigineqarsinnaavoq avaleraasartuut akitsuutaat qaffasissut, kiisalu suliffeqarfiit ilai avaleraasartoorniarnissamut pisassiissutillit aalisalernerq ajormata.

Siunnersuut allaffissornermut sunniuteqassangatinneqanngilaq, akitsuutimmi angissusiinik allanngineq kisimi pineqarmat.

### **4. Inuussutissarsiutinik ingerlataqartunut aningaasatigut allaffissornikkullu sunniutissai**

Siunnersuut kalaallinut aalisarnermik inuussutissarsiuteqartunut pitsaasunik sunniuteqassangatinneqarpoq, kalaallimmi umiarsuaatileqatigiiffii avaleraasartoorniarnerminni maannamut amigartooruteqartarsimasut akitsuutip appartinneqarneratigut sinneqartooruteqarsinnaalissangatinneqarmata. 2016-imi agguaqatigiissitsilluni akit aningaasartuutillu aallaavigalugit naatsorsuutigineqarpoq avaleraasartoorniarneq, umiarsuaatileqatigiiffiit sinneqartoorutaasa procentiisa 2 pct.-imiit 10 pct.-it akornannik qaffariarnissaannik kinguneqassasoq.

Tassa imaappoq akitsuutinik appaaneq aalisarnerulersitseqataassangatinneqarpoq kiisalu aningaasarsiorluarnerulersitseqataassangatinneqarluni, tassa nunatsini aalisakkanik ikerinnarsior-tunik aalisarnermik siuarsaanissaq eqqarsaatigalugu. Taamatuttaaq naatsorsuutaavoq umiarsu-

aatileqatigiiffiit angallatinik nunanit allaneersunik attartornissaat ajornaannerulissasoq. Avale-raasartooraniarneq, aamma nunat allamiut angallataataat atorlugit, annertusisussatut naatsorsuutigineqarmat, akitsuutinik appaanerup siunissami avaleraasartooraniarnissamik naleqarnerulersitseqataanissaa naatsorsuutigineqarpoq, tassa ilaatigut Kalaallit Nunaata avaleraasartoor-tassat ilaannik amerlanerusunik pisassinneqartarnissamik piumasaqarsinnaalerneratigut.

Siunnersuut inuussutissarsiutinik ingerlataqartunut allaffissornikkut sunniuteqassangatinne-qanngilaq.

## **5. Avatangiisinut, pinngortitamut inuillu peqqissusiannut sunniutissai**

Siunnersuut avatangiisinut aamma/imaluunniit pinngortitamut taasarialinnik sunniuteqassa-ngatinneqanngilaq.

Aamma siunnersuut inuit peqqissusiat eqqarsaatigalugu sunniuteqassangatinneqanngilaq.

## **6. Innuttaasunut sunniutissai**

Siunnersuut innuttaasunut aningaasatigut allaffissornikkulluunniit taasarialinnik sunniuteqas-sangatinneqanngilaq.

## **7. Sunniutissai pingaarutillit allat**

Inatsisissatut siunnersuut pingaarutilinnik allanik sunniuteqassangatinneqanngilaq.

## **8. Oqartussaasunik kattuffinnillu il.il. tusarniaaneq**

Inatsisissatut siunnersuut piffissami 10. februar 2017-imiit 17. februar 2017-imut ukununga tusarniaassutigipallanneqarpoq:

Sulisitsisut (GE), NUSUKA, S.I.K., KNAPK, Aalisarnermut Piniarnermullu Naalakkersuiso-qarfik, Inuussutissarsiornermut, Suliffeqarnermut, Niuernermut Nukissiuuteqarnermullu Naa-lakkersuisoqarfik, Deloitte, Grønlands Revisionskontor, GrønlandsBANKEN, Bank Nordik, KANUKOKA kiisalu Kommuneqarfik Sermersooq.

Tusarniaanermut akissuteqarnissamut piffissaliussap qaangiunnerani akissutisiffigineqarput NUSUKA, Aalisarnermut Piniarnermullu Naalakkersuisoqarfik, KNAPK, Sulisitsisut (GE), Kommuneqarfik Sermersooq aamma KANUKOKA.

Oqaaseqaatit tiguneqartut ataani nalinginnaasumik allanneqarput, Naalakkersuisut akissutaat *uingasumik* allanneqartut.

## NUSUKA

NUSUKA-p siunnersuut ilassilluarpa, tassungalu atatillugu oqaatigalugu nunatsinni aalisarnermik ingerlataqartut aalisakkanik ikerinnarsiortunik aalisarnissamut naleqquttunik angallataatillit ikittuinnaasut, taamaammallu avaleraasartooriassagaanni nunat allamiut umiarsuaatileqatigiiffiisa angallatinik attartornikkut suleqatiginissaannik isumaqatigiissuteqarfiginissaat amerlanertigut pisariaqartoq, taamaammallu aamma aalisarnerq selskabimut maanngaanneersumut kiisalu angallatip piginnittuanut akilersinnaasariaqartoq. Taamaammat akitsuutinik appaanissaq, nunatsini aalisakkanik ikerinnarsiortunik aalisarnermik siuarsaanissaq eqqarsaatigalugu aalisarnerulersitseqataasussaq kiisalu aningaasarsiorluarnerulersitseqataasussaq NUSUKA-p isumaqataaffigaa.

NUSUKA-lli siunnersuutigaa, avaleraasartuut angallatit Danmarkimi, Savalimmiuni nunani-luunniit allani angerlarsimaffeqartutut nalunaarsorneqarsimasut atorlugit pisarineqartut akitsuutaat siunnersuutigineqaraluartumiit kiilumut 1,00 kr.-imiit kiilumut 0,75 kr.-imut appartinneqassasoq. Akitsuutip suli appartinneqarnerunissaannik siunnersuuteqarnermi tunngavilersuutigineqarpoq, selskabit aalisarnerup iluani ingerlataqalernissamik eqqarsateqartut, aalisarnermi atugassarititaasut ukiumiit ukiumut allanngorartuunngippata namminerisamik angallatissaminnik pisinissamik takorluugaqarsinnaanerit. Avaleraasartooriarnermi atugassarititaasut oqaluuserineqarnerunissaat, aalisakkanillu ikerinnarsiortunik aalisarnerup iluani ajornartorsiu-taasut oqallisigineqarnissaat NUSUKA-p tassunga atatillugu ujartorpai.

*Angallatit nunanit allaneersut attartorneqaraangata taakkunani inuttat aamma tassaagajut-tarput sulisut nunanit allaneersut. Angallammik nunamit allameersumik piginnittoq inuttal-luunniit akileraarutinik Kalaallit Nunaannut akiliineq ajorput. Taamaammat angallatit nuna-nit allaneersut atorlugit pisanut akitsuutip angallatillu nunatsinneersut atorlugit pisanut akit-suutip assigiinngissutaat 0,60 kr.-it akileraarutit A-t selskabillu akileraarutaasa isertinneqar-tussaagaluit annaaneqartut matussusigassaraat. Akitsuut 1 kr.-imit appasinnerutinneqassaga-luarpat, tamanna angallatit nunatsinneersut angallatinut nunanit allaneersunut sanilliullutik pisortanut akileraarutinik akitsuutinillu akiliinerusarnissaannik kinguneqassagaluarpoq. Ta-manna Naalakkersuisut naleqquttutut isiginngilaat.*

## KNAPK

KNAPK-p oqaatigaa, akitsuutip angissusiata unammillersinnaasumik angissusilerneqartaria-qarnera, matumani aamma nunat allat aalisarnermik ingerlataqartut avaleraasartuut akitsuutaannut tunngatillugu qanoq iliortarnerat periaatsinillu sunik atuinerat qissimigaarneqartaria-qartut kattuffiup assigiinngitsutigut oqaatigisarsimagaa. Islandimi Savalimmiunilu akitsuutit angissusiisa ukiuni qaangiuttuni appasinnerarsuusimani, taamaanneratalu umiarsuaatileqa-tigiiffiit kalaallit selskabiutaannut attartortitsinissamik isumaqatigiissuteqarusussinnaagunara-luurtut soqutiginninngingajalluinnarsimanerannik kinguneqarsimani KNAPK-p tassunga atatillugu innersuussutigaa. Kalaallit Nunaata nunatut sinerialittut inissisimalersinneqarnissaa-ta ukiuni kingullerni eqqartorneqartarnera innersuussutigalugu KNAPK-p oqaatigaa, akitsuutip angissusiata qaffasippallaannginnissaa pingaartuusooq pingaartuusimasorlu, pisassiissutim-

mi amerlanerpaartaasa pisarineqarsinnaanerattassuunakkut periarfissaqassammat. Aningaasaqarnermut Akileraartarnermullu Naalakkersuisoqarfiup avaleraasartuut akitsuutaannik allanguinissamik siunnersuutaa KNAPK-p taamaallilluni tamakkiisumik taperserlugu nalunaarutigaa.

*Siunnersuutip taperserneqarnera Naalakkersuisut qujassutigaa.*

### Sulisitsisut (GE)

Siunnersuutip, Sulisitsisut akitsuutip angissusianik aaqqissuussaananerannillu maannamut isornartorsiuisarnerannut naapertuunera Sulisitsisut tusarniaanermut akissumminni naammagisi-maarnarpaat. Sulisitsisut oqaatigaat, akitsuutip maannakkut angissusia aaqqissuussaanelu qaffasippallaarsimasut, Kalaallillu Nunaat naalagaaffiit sineriallit isumaqatigiinniartarneranni sapingisamik nukittunerpaamik inissisimaqqullugu aalisartut avaleraasartooqassutsip uppernarsaatissaqartinnissaanik qulakkeerinninniarlutik siunertaannut pingaarnermut iluaqutaasi-manngitsoq.

Sulisitsisuttaaq oqaatigaat, akitsuummik appaanissaq aalisarnermi peqataarusussuseqarnermik allisitsissasoq, aammalu Namminersorlutik Oqartussat angallatinik nunat ilaanneersunik peqataaqusinninnerat misileraalluni aalisarnermi aalisartussat pisariaqartinneqartut qulakkeerneqarnissaraluannut akornusiisimanera pillugu Sulisitsisut isornartorsiuisimanerat tassunga atattillugu innersuussutigalugu.

Sulisitsisut siunnersuummi § 3a, imm. 1, nr. 3, litra a-mut tunngatillugu oqaatigaat, kiilumut akitsuutip 45 ørenik appartinneqarnera avaleraasartoorarnissap kalaallit angalataataannit pilerigineqarnerulernissaanik, taamaatullu aamma piffissaq ungasinnerusoq eqqarsaatigalugu aalisakkanik ikerinnarsiortunik aalisarnermik ineriartortitseqataanissaannik kinguneqassasoq.

Sulisitsisut siunnersuummi § 3a, imm. 1, nr. 3, litra b-mut tunngatillugu oqaatigaat, kiilumut akitsuutip 50 ørenik appartinneqarnera kalaallit aalisarnermik ingerlataqartut, aalisarnerup allamit ingerlanneqarnissaa pillugu isumaqatigiissuteqarsinnaanerulernerannik kinguneqassasoq.

*Siunnersuutip kalaallinut aalisarnermik inuussutissarsiuteqartunut pitsaasunik kinguneqassanngatinneqarnerata Sulisitsisunit isumaqataaffigineqarnera Naalakkersuisut nuannaarutigaa.*

### Kommuneqarfik Sermersooq

Namminersorlutik Oqartussat kommunillu tusarniaanermi piffissaliunneqartartut pillugit isumaqatigiissutaat, Namminersorlutik Oqartussat KANUKOKA-llu 20. maj 2010-mi atsioqatigiissutigisaat Kommuneqarfik Sermersuup aallaqqaasiinermi innersuussutigaa, neriuutigalugulu Naalakkersuisoqarfiup siunissami tusarniaasarnissani piffissaliussat il.il., isumaqatigiissummi tassani allaaserineqartut malittarumaarai.

Taamaattorli Kommuneqarfik Sermersuup nuannaarutigaa, akitsuutit angissusiisa assigiinngitsuutinneqarnerat Naalakkersuisoqarfimmit ingerlatiinnarniarneqartoq, tassa umiarsuaatile-

qatigiiffiit Kalaallit Nunaanni angerlarsimaffeqartut akitsuummik appasinnerusumik akiliisineqartarlutik, tamannami Kalaallit Nunaanni inuiaqatigiit avaleraasartooriarnermit aningaasarsiornikkut iluanaarutiginerpaassagaat Kommuneqarfik Sermersooq isumaqarmat.

*Tusarniaanermi piffissap sivikinnera, 2017-imi aasaanerani aalisarluarnissamik qulakkeerininniarluni siunnersuuteqapallannermik pissuteqartoq Naalakkersuisut ajuusaarutigaat. Siunnersuut siusinnerusukkut tusarniaassutigineqartussat ajoraluartumik naammasineqarsinnaasimangilaq. Namminersorlutik Oqartussat KANUKOKA-llu isumaqatigiissutaanni piffissaliussat siunissami eqquutsinneqartarnissaat Naalakkersuisut malinniararumaarpat.*

## KANUKOKA

KANUKOKA-p tusarniaanermi piffissaliussap sivikitsuunera pillugu aallaqqaasiilluni oqaatigaa, aasaanerani aalisarluarnissamik qulakkeeriniarneq taama sivikitsigisumik piffissaliilluni tusarniaanermut pissutigittissallugu uppersaatissaanngitsaq, tusarniaanerimmi Namminersorlutik Oqartussat KANUKOKA-llu suleqatigiinnissamik isumaqatigiissutaat naapertorlugusap.ak. tallimanik sivilissuseqartussaammata. KANUKOKA-p tassunga atatillugu oqaatigaa, sivikitsuararsuarmik piffissaliilluni tusarniaasarnerit Naamminersorlutik Oqartussat iluanni suleriaatsinik pissuteqartinneqartut taamaallaat KANUKOKA-p akuersaarsinnaammagit, taakku suuneri tusarniaanermi erseqqissarneqarlutillu nassuiarneqarpata.

KANUKOKA-p siunnersuummut tunngatillugu oqaatigaa, siunnersuut avaleraasartuunut Tunumi, 1. juni 2017-imi kingusinnerusumiluunniit pisarineqartunut atuuttoq, tassungalu atatillugu oqaatigalugu akitsuutitigut isertinneqartussat naatsorsorneqartut 2017-imi piffissap akitsuuteqarfiusup qaammatinik arfineq-marlunnik sivilissuseqartup iluani isertitassaappata, taava inatsisissatut siunnersuutip Inatsisartut 2017-imi upernaakkut ataatsimiinneranni sapinngisamik piaarnerpaamik akuersissutigineqarnissaa pingaartuussasoq.

KANUKOKA-ttaaq oqaatigaa siunnersuummut oqaaseqaatini nalinginnaasuni kukkuneqartoq, tassami inatsisissatut siunnersuutip KANUKOKA-mut tusarniaassutigineqarsimanera taaneqanngimmat.

*Tusarniaanerup sivikinnera Naalakkersuisut ajuusaarutigaat, oqaatigalugulu inatsisissatut siunnersuutininik matumattut ittunik suliaqartarneq sivikitsumik piffissaqarluni pigajuttarmat, soorluttaaq ataatsimiinnerit, imarisaanik aalajangiussivinnerit, nutserinerit il.il. pissutigalugit ilaatigut kinguaattoortoqartartoq, taamaammallu piffissaliussat nalinginnaasunit allaanerisut ilaannikkooriarluni atorineqartariaqartartut.*

*Siunnersuutip aningaasatigut sunniutissaanut tunngatillugu Naalakkersuisut oqaatigaat, avaleraasartooriarluni aalisarneq ukiut tamaasa piffissami junimiit oktoberimut ingerlanneqarnerusartoq. Tassa imaappoq siunnersuutip aalajangersarneqareersumit siusinnerumik suliarineqarnissaa akitsuutitigut isertinneqartussat missingersuutaasunut 40 mio. kr.-iusunut sunniuteqarnaviannngilaq.*

*Siunnersuummut oqaaseqaatini nalinginnaasuni kukkuneq iluarsineqarpoq.*



Aalisarnermut Piniarnermullu Naalakkersuisoqarfik

Aalisarnermut Piniarnermullu Naalakkersuisoqarfik siunnersuummut isumaqataavoq allanillu oqaaseqaatissaqarani.

## **Aalajangersakkanut ataasiakkaanut oqaaseqaatit**

### *§ 1-imut*

*Nr. 1-imut 2-mullu (§ 3a, imm. 1, nr. 3, litra a aamma b)*

Siunnersuutaavoq avaleraasartuut angallatit Kalaallit Nunaanni angerlarsimaffeqartutut nalunaarsorneqarsimasut atorlugit pisarineqartut akitsuutaat maannakkut kiilumut 0,95 kr.-iusoq kiilumut 0,40 kr.-inut appartinneqassasoq, aamma avaleraasartuut angallatit Danmarkimi, Savalimmiuni nunaniluunniit allani angerlarsimaffeqartutut nalunaarsorneqarsimasut atorlugit pisarineqartut akitsuutaat kiilumut 1,50 kr.-imiit kiilumut 1,00 kr.-imut appartinneqassasoq.

### *§ 2-mut*

Inatsisartut inatsisaata 1. juni 2017-imi atortuulernissaa siunnersuutaavoq.